

國藥詮證

卷三



國藥詮證卷三

寶山王劍賓編

栝樓根

性味 苦寒無毒

效用 主消渴身熱煩滿大熱補虛安中續絕傷

說明 栝樓根性味苦寒。苦能燥濕。寒能清熱。本經主治消渴。以濕阻而渴。故燥濕可以通阻而止渴。濕化為熱則身熱。未盡之濕留滯胸中則煩滿。故清其已化之熱。燥其未化之濕。可以除身熱而去煩滿。濕重則化為大熱。治以苦寒則能燥濕而清熱。濕盛則氣阻而成虛。故燥濕可以和氣而補虛。氣和則中自安也。絕傷為濕熱所阻則氣血不和而遷延不愈。燥濕可以利氣而散瘀血。氣行血調。故能續絕傷也。別錄用以除腸胃中瘡熱入疸身面黃。大



上海中醫藥大學圖書館版權所有

明用以治熱狂時疾。皆爲濕熱重證。非燥濕不能清熱。故以苦寒主治也。李杲曰。栝樓根純陰。解煩渴。行津液。心中枯涸者。非此不能除。氣中挾濕則煩。濕阻而氣不運。化津不上布則渴。故燥濕可以除煩。通阻可以止渴。惟須用之於濕已化熱之候。如未化熱而用之。則必寒滯而氣悶也。成無己曰。津液不足則爲渴。栝樓根味苦微寒。潤枯燥而通津液。是爲渴所宜也。李氏之說。本於經驗。成氏之說。出於想像。栝樓根既能清大熱。決非微寒之藥。既能治入疸身黃。決非潤燥之藥。近人並無大熱而用栝樓根者。皆宗成氏微寒之說也。服之令人苦悶。以其能助寒也。有用以潤燥者。亦宗成氏之說。愈服而愈燥。不知其爲燥藥而誤以爲潤藥也。故非有大熱不可用栝樓根以清熱。非有濕阻不可用栝樓根以潤燥。

○栝樓根湯 治產後小便數而口渴

栝樓根 麥門冬 甘草 黃連 人參 生薑 大棗 桑螵蛸

○青竹茹湯 治勞復及陰陽易病

栝樓根 青竹茹

○三七湯 治傷寒中風得之三日至七八日不解胸脅痛四肢逆乾嘔水漿不下腹中宿食不消後重下血一日數十行

茯苓 黃芩 人參 芒硝 乾地黃 大黃 麻黃 栝樓根 寒水石

第一方以栝樓根黃連清熱燥濕。麥門冬瀉肺。甘草大棗和氣。人參益氣。生薑散結。桑螵蛸瀉濕。產後小便數而渴。爲濕熱阻滯所致。故清熱燥濕以通其阻。瀉肺瀉濕以利其氣。佐以益氣和氣。使能運化。則小便利而渴自止矣。第二方以栝樓根青竹茹清熱燥濕。勞復及陰陽易。肺胃爲濕熱所阻而氣不和也。故清熱燥濕以利其氣。使氣暢血調而歸於和。第三方以茯苓利濕。黃芩栝樓根清熱燥濕。乾地黃清血熱。麻黃燥濕散寒。芒硝大黃寒水石瀉



滌積聚邪氣。所病雖爲傷寒中風。因濕熱阻滯。宿食不消。故氣血不調。胸脅痛而四肢逆。後重下血。濕已化熱而侵及於血。濕熱無出路。則下注。故以清熱燥濕爲主。而佐以消積也。

## 栝樓實

性味 苦寒無毒

效用 主潤肺燥降火治欬嗽滌痰結利咽喉止消渴利大腸消癰腫瘡毒

說明 栝樓實性味效用均與根相同。故本經主治不分根實。後人雖根實分用。仍不出本經主治範圍。如上文所列之效用爲李時珍所舉也。而栝樓根無不備之。李氏以成無已有苦寒以瀉熱之說。謂爲不嘗其味。隨文傳會。不知卽使用實。亦包括皮瓢仁在內。三者並不皆甘。不能以甘字概之。仁之所以能潤肺燥。亦爲散濕利氣之效。與麻子仁之散濕同一作用。非以其甘潤



而能治肺燥也。故滌痰結利咽喉止消渴利大腸消癰腫瘡毒皆爲燥濕清熱之效。其效在於苦而不在於甘。

○栝樓丸 治食積痰多壅滯喘急

栝樓仁 半夏 山查 炒神麴 黃芩

○清膈導痰湯 治膈上熱痰咯吐不出咳吐稠黏

天花粉 栝樓仁 白朮 白茯苓 石膏 礞石 黃芩 貝母

桔梗 陳皮 甘草

○歸耆湯 治癰疽無頭但腫痛

黃耆 當歸 栝樓仁 皂角刺 金銀花 甘草

第一方以栝樓仁燥濕利氣。半夏燥濕瀉肺。山查炒神麴消食積。黃芩清熱燥濕。壅滯喘急。不由於痰多而由於濕阻。故燥濕可以利氣而除喘。食積亦易使氣阻。故消積亦可爲利氣之助。第二方以天花粉栝樓仁燥濕清熱。白



朮白茯苓利濕。石膏清胃熱。朴硝導積滯。黃芩清熱燥濕。貝母桔梗陳皮散濕利氣。甘草和氣。膈上熱而痰咯吐不出。爲濕所阻也。故以燥濕散濕爲主。濕去則氣暢。以膈上熱。故均用清燥之藥。因食積。故用導滯之藥。第三方以黃耆益氣。皂角刺散結。當歸燥濕利氣。栝樓仁燥濕清熱。金銀花利氣消腫。甘草解毒。黃耆協皂角刺可使腫處破頭。毒有出路則可以消腫而止痛也。觀於本方中之栝樓仁。可知其有燥濕清熱之效。而非甘潤之謂也。

## 瞿麥

性味 苦寒無毒

效用 主關格諸癰結小便不通。出刺決癰腫。明目去翳。破胎墮子。下閉血說明。瞿麥性味苦寒。本經主治關格諸癰結。以燥濕可以散結而通閉也。濕阻而氣滯則小便不利。故燥濕利氣可以利小便。竹木刺入肉則腫而難出。



燥濕可以消腫。腫退則刺自出矣。癰腫爲濕熱所化。故燥濕清熱可以治癰。腫肝氣不和則目生翳而不明。燥濕可以驅風而利氣。故能明目而去翳也。胎繫於氣。氣和則可以養胎。氣本和而遽投以燥濕之藥。則氣不和而破胎墮子矣。濕阻則氣滯而血閉。故燥濕利氣可以通阻而開閉也。日華以水調末塗腫毒。以其能散氣而退腫也。熈太陽穴治頭痛。以其能驅風而散濕也。貼心胸止鼻衄。以其能利氣而散血也。甄權治肝熱風眼赤淚。苦能燥濕。寒能清熱。燥濕可以驅風。清熱可以退赤也。瞿麥以利水著稱。而人皆用以通小便。遂沒其驅風散濕之效。不知其所以能利小便。卽爲驅風散濕之效也。惟其性暴而其效速。用之於濕熱阻滯之病則佳。如無濕熱阻滯而用之。卽有降泄過度之患。故不可以不慎也。

○地膚子湯

治下焦濕熱小便赤黃不利數起出少莖痛或血出

地膚子

知母

黃芩

猪苓

瞿麥

枳實

升麻

通草

葵子



海藻

○榆皮湯 治淋病

榆皮 滑石 黃芩 甘草 瞿麥 葵子

○瞿麥散 治癰排膿止痛利小便

瞿麥 芍藥 桂心 赤小豆 麥門冬 川芎 黃耆

當歸

第一方以地膚子猪苓瞿麥通草葵子海藻清膀胱濕熱通小便。知母瀉肺通腎氣。黃芩清熱。枳實導滯。升麻散氣。濕熱下注則小便不利。莖痛出血。濕已化熱而成毒也。故以燥濕清熱主治。而注重於利水。第二方以榆皮黃芩清濕熱。滑石導滯收澇。甘草解毒。瞿麥葵子燥濕清熱通小便。淋為濕熱病。故以燥濕清熱主治。而佐以利水。第三方以瞿麥燥濕利水。芍藥散濕利氣。桂心散寒濕。赤小豆瀉濕。麥門冬瀉肺。川芎燥濕利氣。黃耆益氣。當歸行氣。



活血。白斂解熱毒。癰痛。小便不利。濕阻而寒滯也。故利水以通阻。燥濕以利氣。溫散以排膿。泄毒則止痛。

### 苦參

性味 苦寒無毒

效用 主心腹結氣。癥瘕積聚。黃疸溺有餘瀝。逐水除癰腫。補中明目止淚。

說明 苦參性味苦寒。本經主治心腹結氣。以其有燥濕清熱之效。可以散結。

而利氣也。濕熱阻滯而血病則成癥瘕。氣病則飲食不化。苦參有破結逐濕之效。故能除癥瘕而散積聚。濕熱陰化則成黃疸。腎爲濕阻則溺有餘瀝。故燥濕清熱可以治黃疸而利小便也。燥濕可以逐水。清熱燥濕可以除癰腫。濕去則氣和而可以補中。驅風而可以明目止淚。震亨曰。苦參能峻補陰氣。或得之而致腰重者。因其氣降而不升也。非傷腎之謂也。其治大風有功。况



風熱細疹乎。不知陰爲濕阻則燥濕可以益陰。若無濕而燥之則傷氣。無熱而清之則寒滯。其有不腰重者乎。治大風有功者。不一定能治風熱細疹。以清燥過度。則氣血不和而熱可內陷也。故苦寒之藥。須量其濕熱之深淺而用之。

○苦參湯 治熱病五六日以上

苦參 黃芩 生地黄

○苦參散 治人忽然振寒發黃小便赤少大便時閉氣力無異飲食不  
妨已服諸湯散餘熱不除

苦參 黃連 瓜蒂 黃柏 大黃 葶藶

○龍膽丸 治眼兩胞粘精赤爛

龍膽草 苦參 牛蒡子

第一方以苦參黃芩清濕熱。生地黄清血熱。此方可治由濕化熱之單純病。



不能統治一切熱病。第二方以苦參黃連黃柏清熱燥濕。大黃瓜蒂葶藶瀉熱瀉濕。忽然發黃。小便赤少。爲濕化不透之象。治以大苦大寒。燥其未化之濕。清其已化之熱。因濕重燥之不能盡。故佐之以瀉。此方極峻而極佳。對證必能有效也。第三方以苦參龍膽草瀉肝熱。牛蒡子散風熱。此爲風濕病。故以驅風散濕主治也。

## 青蒿

性味 苦寒無毒

效用 主疥癩疔癰惡瘡殺蟲治留熱在骨節間明目

說明 青蒿性味苦寒。本經主治疥癩疔癰。以其有散風逐濕之效也。濕化爲熱毒則成惡瘡。故燥濕清熱可以治之。蟲生於濕。故燥濕可以殺蟲。苦寒可以入裏。故治留熱在骨節間。目爲風濕所阻則病。故燥濕驅風可以明目。青

蒿雖爲苦寒之藥。有清熱燥濕之效。而非大苦大寒。故治濕盛化爲壯熱之病。則無效。治殘餘之風濕留滯於骨節間。或散於表而爲疥癩癰瘡。則恰到好處。骨蒸勞熱。亦殘濕爲病。故可以治之也。

○青蒿飲 專治勞疾

青蒿 嫩桃枝 嫩柳枝 地骨 甘草

○青蒿散 治小兒室女肌瘦潮熱

青蒿 生甘草 烏梅 小麥

○蛤蚧散 治勞熱療肺損止咳嗽

蛤蚧 黃芩 甘草 胡黃連 秦艽 生地黃 熟地黃 人參

柴胡 麻黃 知母 杏仁 貝母 青蒿 桔梗 木香 龍膽草

鱉甲 烏梅 生薑 大棗

第一方以青蒿地骨清潛伏之濕熱。桃枝柳枝清熱除痰。甘草和氣。勞疾爲

積濕不化所致。故以清濕化熱主治。惟用大苦則寒滯。用大燥則氣虛。故用微寒微燥而能深入之藥。以清其殘濕而化其微熱。則氣和而病去矣。第二方以青蒿清潛伏之濕熱。生甘草散濕利氣。烏梅斂氣殺蟲。小麥養肺和氣。此方治濕滯發熱。雖不能頃刻見效。而久服有功。以潮熱爲氣中挾濕所致。小麥甘草均能散濕利氣也。第三方以蛤蚧瀉肺利氣。黃芩清熱。甘草大棗和氣。胡黃連秦艽清熱燥濕。生地黃清血熱。熟地黃散濕。人參益氣。柴胡利氣。麻黃燥濕散寒。知母杏仁貝母除痰。青蒿龍膽草清熱利氣。桔梗木香散濕利氣。鱉甲清血瀉濕。烏梅收澀斂氣。生薑散結氣。蘊濕不散則變爲勞熱。濕阻氣滯則咳嗽。故散濕以治勞熱。瀉肺以治咳嗽。佐以清血利氣。使濕盡而氣和也。

## 石韋



性味 苦平無毒

效用 主勞熱邪氣五癃閉不通利小便水道

說明 石韋性味苦平。本經主治勞熱邪氣。以濕化為熱則氣阻。苦能燥濕而利氣。故有散氣之效。因濕阻氣滯而癃閉者。散之則通。別錄止煩下氣通膀胱滿。氣中挾濕則氣滯而煩。燥濕可以除煩。並能利氣而下水。以泄膀胱之滿。故所治之病。雖若氣虛。仍為實滿。別錄用以補五勞。是以瀉為補也。

○石韋湯 治產後卒淋氣淋血淋石淋

石韋 黃芩 通草 甘草 榆皮 葵子 白朮 生薑 大棗

○石韋散 治血淋

石韋 當歸 蒲黃 芍藥

第一方以石韋通草葵子瀉濕利水。黃芩榆皮清熱燥濕。白朮利濕。生薑散結。大棗和氣。產後濕化為熱則成淋。故以清熱瀉濕利水除淋主治。通阻之

後佐以和氣使病去而身安也。第二方以石韋燥濕清熱當歸行氣活血。黃散血芍藥瀉滯。濕化熱而傷血則爲血淋。燥濕行氣可以通阻。散血可以止血。本方照習慣用赤芍可以瀉血滯也。

## 海藻

性味 苦鹹寒無毒

效用 主癭瘤結氣散頸下硬核痛癰腫癥瘕堅氣腹中上下雷鳴下十二水腫

說明 海藻味苦鹹而性寒。本經主治癭瘤結氣散頸下硬核痛癰腫癥瘕皆爲濕熱化毒之證。苦能燥濕寒能清熱鹹能制血故有散結消腫之效。血滯則成癥瘕。氣積則爲堅氣。血滯而氣阻則水失運化之力而上下雷鳴。燥濕可以散氣而利水。制血可以破結而除癥瘕。故有破堅氣下水腫之效也。別

錄療皮間積聚暴癰瘤氣結熱利小便。皮間積聚濕熱集表而成。化毒則爲暴癰瘤氣。燥濕可以散結氣制血。去癰瘕可以泄毒。故能兼治內外病也。

○海藻湯 治欬而下利胸中痞而短氣心中時悸四肢不欲動手足煩不欲食肩背痛時惡寒

海藻 半夏 五味子 生薑 細辛 茯苓 杏仁

○通氣丸 治癰氣

海藻 海帶 昆布 夏枯草 木通 訶子 薄荷 杏仁

第一方以海藻燥濕利水。半夏杏仁瀉肺利氣。茯苓利濕。生薑散寒。細辛散結氣。五味子收澀歛氣。欬而下利。水阻而氣滯也。心中時悸。背痛惡寒。皆爲水濕阻滯所致。故以利水散濕主治而佐以利氣。第二方以海藻海帶昆布燥濕利水。夏枯草散結氣。木通瀉濕利氣。訶子杏仁薄荷化痰利氣。癰氣爲濕熱病。由積水化濕。故以利水爲治本之法。用水草利水濕。以類相從也。